

四庫全書

子部

欽定四庫全書

子部

續名醫類案卷

十九
二十

詳校官太醫院吏目_臣周世泰

編修_臣倉聖脈覆勘

總校官編修_臣

王燕緒

校對官中書_臣

劉源溥

謄錄監生_臣

陳箴

欽定四庫全書

續名醫類案卷十九

錢塘魏之琇撰

諸氣

鄧安人年五十忽然氣痛投神保丸愈不一二日再痛
再服神保丸六七十粒大腑不通其痰轉甚亦有要
用沈香木香薑桂等藥而未敢投痛甚則築心築背
築定兩脇似有兩柴十字挿定心脇叫聲徹天召良

甫診之六脉沈伏乍來乍去衆問胗脉吉凶何如答
曰凡久痛之脉不可準也但以症辨用藥觀其人質
肥偉問其脉數日不通曰實痛也其腹必脹但以人
按之痛甚手不可向近此大實也經曰大滿大實者
可下之用替針九五六百粒是夜即愈

俱醫說
續編

羅謙甫治趙運使夫人年五十八歲于至元甲戌三月
中病臍腹冷疼相引脇下痛不可忍反復悶亂不得
安卧以當歸四逆湯主之灸中庭穴

全上

朱丹溪治一婦氣自小腹丹田冲上遂吐清水火氣上逆由丹田虛寒故也用白朮二兩白豆蔻五錢為末早飯後以白湯送下白朮補脾豆蔻溫肺此藥服之則金水相生其病自愈若在男子純陰無陽則為不治之症矣

陳三農治一人怒氣感寒小腹有塊氣送上行喘息不安衆用散氣降氣藥益甚曰此因汗下過多傷其胃氣胃虛為衝脉所逆并脇下少陽脉二道而反行病

多厥逆以調中益氣湯加炒黃柏炒青皮一劑而愈
一老人大怒氣自臍下上攻兩脇作痛喘息不卧此動
厥陽之火也兩脇肝膽部分怒氣傷肝而動龍雷之
火故逆上作痛耳用伏龍湯下左金丸愈

一貴人患氣從小腹上攻胸脇頭項遍身急脹而痛諸
治罔效曰此督脉為病也經曰督脉為病令人逆氣
而裏急以四物加炒黑黃柏醋炒青皮一劑而愈

朱丹溪治鄭仲游年二十三膈有一點相引痛吸氣皮

覺急滑石枳殼炒各一兩桃仁黃連炒各半兩炙甘草二錢為末每一錢半以蘿蔔自然汁研煎熟飲之

一日三五次

作淤
血治

鄭仲本年二十七因喫熱補藥又妄自學吐納以致氣亂血熱嗽血消瘦遂與行倒倉法今嗽血消瘦已除因喫炒豆米腸間有一點氣梗痛似有一條絲垂映在腰與小腹亦痛大率偏在左邊此肝部有惡血行未盡也滑石枳殼一兩柴胡黃連五分桃仁二兩黃

丹三錢生甘草二錢紅花一錢服法同前

繆仲淳治高存之瘡浦生氣上逆每飯下一二口輒噉
氣數十口再飯再噉食頃三四作曰此氣不歸元中
焦不運也每劑須人參二錢不信服快氣藥愈甚逾
二三月曰今須參四錢矣不信又逾二三月曰今須
六錢矣不信又逾月飲食不下每嘔冷氣如團而出
上下氣不屬分必死存之坐其家迫令繆藥服首不
動再煎不動然亦不如他湯藥輒嘔也服三劑忽心

口下如爆一聲上則噯氣下則小遺無算上下洞然
即索粥頓食三四碗不上逆矣服五六劑減參二錢
噯逆復作仍用六錢而安一月後方減參二錢服半
年全愈人參六錢麥冬三錢五味二錢橘紅一錢砂
仁一錢白芍二錢沉香五分益智仁一錢五分萸肉
三錢蘇子二錢枇杷葉三大片水煎臨服加沉香汁
十五匙逆水蘆根汁一大盞又十倍為末山藥糊為

丸空心白湯吞

廣筆記

梁溪一婦人喉間如一物上下作梗前後板痛服仲淳
方二十劑愈降香通草蘇子橘紅枇杷葉人參炙草
石菖蒲麥冬甘菊白芍遠志白豆仁木瓜石斛加蘆
根汁一鍾同煎八分入姜汁二匙

全上

哮喘

丹溪治一人哮喘十日一發此病在上焦不得汗洩正當
十月遂以麻黃黃芩各二錢入姜汁煎服臨卧進小
胃丹二十粒而安

聖濟治一人飲醋噎喉喘哮不止用粉甘草二兩去皮
破開以猪膽六七枚取汁浸三日炙乾為末蜜丸清
茶下三四十丸漸愈

王宇泰治一人鹽哮用白麵二錢沙糖搜和以糖餅灰
汁捏作餅子放在爐內煨乾剝出切作四塊以輕粉
四錢另炒摻在餅內食之吐痰而愈

以上俱
大還

龔子才治一人哮喘十數年發則上氣喘促咳嗽吐痰
自汗四肢厥冷六脉沉細此氣虛脾弱與六君子加

黃芪五味二冬杏仁薑棗煎服而愈

一人自幼患哮喘之症每遇寒即發發則喘急咳喘痰涎上涌久不瘥已成痼疾與甘桔苓連瓜蒌貝母二冬清肺合六味補腎為方名清上補下丸服一料全愈

孫文垣治查少川夙有哮喘疾每發則遍身如燎上氣

短促喉中痰聲響若湯沸每經七晝夜汗出漸愈

七日來復

之義居恒嗜飲縱欲不避風寒有教以石膏麻黃杏仁

枳殼細茶各一兩作大劑飲之名曰五虎湯喘至即
以此禦之隨飲而止屢發屢進應若桴鼓凡三年飲
五虎無算因而腹大如覆箕兩腿光腫如柱內外臃
瘡清水不竭腥氣逼人不能伏枕者五閱月診時長
至後一日也氣高而喘身熱而煩覆以棉被足納火
箱環列火盆絨帽貂套束之以帕鼻亦絨套籠之坐
重幔中猶凜凜畏寒今已十日其脉浮大無力其色
白中隱青蓋舊病由于氣虛中滿新病由寒在表而

然合先散之以紫蘇馬蹄辛甘草防風白豆仁蒼朮
陳皮人參羌活生薑一帖得微汗畏寒之狀已去獨
鼻尚寒用防風黃芪二兩煎湯令熏其鼻飯頃而止
日凡三熏次日亦愈嘔惡不止用人參溫脾湯加丁
香進之一帖旋已因欲利水自食鯉魚數斤夜脹極
以平胃散入橄欖肉一兩能解魚毒兩劑而定獨腹脹小
水不利不能伏枕為苦以附子理中湯加砂仁補骨
脂赤小豆桂心連進四劑小水略長繼以尊重丸日三

服之每服五九五日後小水通利可以卧矣守此調理脹消而平

李士材治顧文學十年哮喘百藥無功診其兩寸數而瀉曰瀉者痰火風寒久久盤据根深蒂固矣須補養月餘行吐下之法半年之間凡吐下十次服補劑百餘遂愈更以補益氣為丸加雞子秋石服年許永不再發

施沛然治阮二華室患哮喘過用涼劑痰上壅面目浮

黃而腫每昏暈則形靜若死甦則胸脇之聲聞于外
庭醫者望而却走診其六脉沈滑而弱兼緊病得之
冬傷于寒經云形寒飲則傷肺古人治此病必用麻
黃輕清辛散之劑若投以寒涼則邪氣蔽竅而不得
泄痰日膠結上焦之氣壅而不宣乃用通關散涌其
痰涎凡三涌而痰氣始清喘息始定後以三拗湯兼
導痰湯出入調理月餘而安

錢國賓治金陵青衿趙灝瀕母年六旬得痰症晝夜吼

鋸嘔痰數碗初尚能行後漸不起幸胃不病飲食如
常多醫罔效脉之六部浮滑右寸關更甚浮主肺氣
虛弱滑主脾經積痰乃痰吼症也用導痰加杏仁麻
黃廿劑病勢不減辭去又更二醫反重複求治曰吾
技盡矣容思之忽悟吼痰屬太陰肺經之症肺乃清
虛之藏六葉兩耳四垂如蓋今膠痰固于肺縫中呼
吸而作吼鋸之聲且胃主納受脾主運化令胃納而
脾不運停飲作痰涌出非却劑不可也以三白丸方

示彼用白朮三分煨黃貝母桔梗各三分搗飯為丸
黍米大以冷茶睡下七丸七服痰止吼定服理脾清
肺藥痊大抵病危至此不用客却之味弗知此七方
十劑之意者也古人學力深今人學力淺再思能用
狼虎却奪之劑學力方到若迎奪却伏神兵奇正當
並用也奚王道可以盡岐黃之伎哉如果見真却劑
亦不妨暫用也

喘

金陵一鋪治哮喘白果定喘湯服之無不效者其人以
此起家方用白果二十一个炒黃麻黃三錢蘇子二
錢欵冬花法製半夏桑白皮蜜炙各二錢杏仁去皮
尖黃芩微炒各一錢半甘草一錢水三鍾煎二鍾隨
時分作二服不用薑

攝生方
本草綱目

琇按此方惟風寒外感者宜用若上盛下虛氣不
歸元者服之立斃如不問虛實盡行與之雖起家
而殺人多矣然今之時師執方遇病謬為知脉其

人亦未必不起家而其罪則加等矣

瀘東治一人九月間病發熱惡寒喘急脉洪大而似實
衆作傷寒治勿效此火甚之脉非真實也止視其短
氣不足以息即當作虛治以補中益氣湯加麥冬五
味子熟附子三分六劑愈 亦有痰食阻滯而聲微
脉促者與虛症相似不可不審也

陳三農治一人每勞或怒即喘急吐痰不卧衆以降火
化痰理氣清肺之劑不效脉浮數而虛滿此陰虛火

動其痰也用補陰平肺飲下咽喘即定而愈

全上

薛立齋治一婦人傷風寒作喘或用表散愈而復患仍用前藥其症益甚飲食少思胸腹不利此因脾肺氣虛也先用六君子湯加桔梗漸愈又用補中益氣湯全愈

侍御譚希曾喘咳吐痰或手足時冷此中氣虛寒用補中益氣炮薑而愈

一婦人患前症屬命門火虛不能生脾土用補中益氣

湯八味丸而痊後復患其喘益甚用前藥不應遂用
黑錫丹二服喘止仍用前二藥而諸症痊凡屬邪氣
有餘者其症易識治效亦速其屬元氣不足者變症
不一效非可以旦夕期也

定西侯蔣公患上氣喘急其脉寸口洪滑此痰滯胸膈
也令先服稀涎散二錢更以熱水頻頻飲之

用代探
法殊妙

則溢而吐其痰如膠內有一長條裏韭葉一根遂愈
一路姓者年近五十身體肥大飲食倍常病月餘每行

動即喘診之六脉微瀯曰此死症也衆謂安後逾月果卒

孫文垣治程菊泉暑月患喘嗽咳咳連聲濃痰滾滾行動則喘促不寧夜分口渴胸膈脹悶脉兩寸滑而數兩關弦此肺有宿痰膽有鬱火經云火鬱發之又風寒外束者可發用蘇子半夏麴杏仁各一錢石膏二錢款冬花桑皮各八分桔梗枳殼各五分麻黃三分病不減改以杏仁陳皮人參貝母款冬花麥冬各七

分苡仁一錢五分桔梗知母各五分五味子十粒桑皮一錢陳皮六分痰減半胸膈未舒口乾脚熱前方減去款冬五味加枳殼葶藶兩帖全愈

陸祖愚治唐鳴和平時有火症因試事成痰火咳嗽日夜吐黃痰二三椀氣逆喘急飲食不進服枳梗二陳尤甚改服參朮幾危脉之兩寸俱洪滑而數乃用茯苓桑皮貝母苓連花粉元參枳殼加牛黃竹瀝二三劑胸寬氣緩七八劑痰乃白色去牛黃三十餘劑而

安

黃履素曰予家有庖丁王姓生平多慾年四十患脚痛
往針予謂此足三陰虛針無益也數年後患痰喘胸
中痛晝夜不眠予謂此腎虛氣不歸元峻補其下則
氣自降適名醫陳月坡來診其持論與予畧同奈病
者服陳藥嫌其作悶別尋粗工治之大服降氣寬中
之劑服後覺寬寬後復發病者尚以暫寬為效信服
之以至于死良可數也大凡此等病服藥初覺悶久

當漸寬漸愈愚者嫌悶而別求寬藥死者比比而是
醫者病家如脾虛者亦然初服朮必作悶久則自寬
兩宜熱志破氣消導之藥服之覺寬久乃愈悶以至不救病者
不可不知

李士材治一人發熱乾欬呼吸喘急始用蘇子降氣不
應乃服八味丸喘益急診之見其兩顴俱赤六脈數
大此肺肝蘊熱也以逍遙散用牡丹皮一兩苡仁五
錢蘭葉三錢連進兩劑喘吸頓止以地黃丸料用麥

冬五味煎膏及蠟膠為丸至十日而康

朱太學喘急多痰可以坐不可以卧可以俛不可以仰
惶急求治李曰兩尺獨大而軟為上盛下虛遂以地
黃丸一兩用桔梗三錢枳殼二錢甘草一錢半夏一
錢煎湯送下不數劑而安

黃給諫中氣大虛發熱自汗喘急診之脉大而數按之
如無此內有真寒外見假熱當以理中湯冷飲舉家
無主不能信從惟用清熱化痰之劑遂致不起

葉方伯夫人喘急痞悶肌膚如灼汗出如洗目不得瞑
診之六脉皆空所謂汗出如油喘而不休絕症見矣
辭不治三日而歿

宋氏女中氣素虛食少神倦春初忽然喘急悶絕不知
人手足俱冷咸謂斃矣李曰氣虛極而不清肅不能
下行非大劑溫補決無生理遂以人參一兩乾薑三
錢熟附子三錢白朮五錢藥服而甦後服人參七斤
餘薑附各二斤遂全愈

孫氏女久嗽而喘凡順氣化痰清金降火之劑幾于遍
嘗絕不見效一日喘甚煩躁李視其目則脹出鼻則
鼓肩脉則浮而且大肺脹無疑矣遂以越婢加半夏
湯投之一劑而減再劑而愈曰今雖愈未可恃也當
以參朮補之助養金氣使清肅下行竟因循月許終
不補再發遂不救藥矣

馮楚瞻治司文選素患痰喘發則飲食不進旦夕不寐
調數月不效脉之兩寸少洪餘皆沉弱其右關尺微

細更甚乃命門之火衰極無根虛陽上浮且服剋削
脾元虧損致痰涎益甚虛氣愈逆以炒黃白朮八錢
固中氣為君炒燥麥冬三錢清肺引氣降下為臣炮
薑二錢溫中導火牛膝二錢下趨接引五味子一錢
斂納收藏並以為佐製附子一錢五分承上藥力直
達丹田為使如是數劑痰退喘止食進神強久服八
味丸不再發

吳乎先治趙太學患水氣咳嗽而喘誤作傷風概投風

藥面目盡腫喘逆愈甚曰風起則水涌藥之誤也以
真武湯溫中鎮水諸症悉平

李成槐之室驀地氣喘呼吸促急提不能升嚥不能降
氣道噎塞勢甚危或作痰逆氣滯欲用牛黃蘇合二
丸不敢遽服脉之兩尺微細無神此肝腎虧損子午
不交氣脫症也用人參一兩熟地二兩當歸五錢甘
草二錢一帖稍定二帖喘平凡氣短似喘人謂其病
在上不知元海無根病實在下也誤治立危

予遇此等症重

投熟地無力之家不能備參者以棗仁
一兩枸杞子一兩代之亦應如桴鼓

張飛疇治韓順溪內子患喘症月餘服破氣寬胸豁痰
清火等藥不效發表利水亦不應其痰轉急稍動則
喘難以休息診之六脉細數而面赤戴陽用大劑六
味地黃丸作湯加青鉛兩許一服而緩三服而安
柴嶼青治程別駕尊人高年忽患痰喘不進飲食診其
脉有根決無意外事用四磨湯內加入參一兩一服
而愈

王觀察在太史時方酷暑令媳面紅唇燥發喘不止足冷至脞危甚兩脉鼓指按之微細必過服苦寒所致詢之果然曰此戴陽症也內真寒而外假實急以人參三錢熟附子一錢五分投之喘定又加肉桂一錢五分半夜尚發躁煩足冷未愈遂以六味湯內加桂附各一錢五分六劑並煎冰冷頻頻飲之而愈

少宗伯鄒小山春月患喘咳吐痰甚劇延診視按其諸脉和平惟肺部沉洪明有伏邪此小疾也緣醫謂風

寒凝結用桂溫散徹夜不寐憊甚不支遂用清理藥
劑而愈

張三錫云綱目載一男子五十餘病傷寒咳嗽喉中聲
如齶與獨柴湯一服而齶聲除至二三帖咳嗽亦漸
退服二三斤病始痊不佞亦屢用有驗但可與知者
道耳今人因右寸脉大不知分別有力無力遽認為
實枳桔桑杏苓梔妄投死亦不悔者多矣

薛立齋治一儒者體肥仲夏患痰喘用二陳苓連桔梗

痰喘益甚加桑皮杏仁瓜蒌盜汗氣促加貝母枳殼
不時發熱飲食漸減脉大而無力以為脾肺虛寒用
八味地黃丸以補土母用補中益氣湯以接中氣而
愈

一婦人早間吐痰甚多夜間喘急不寐夫早間多痰乃
脾虛飲食所化夜間喘急乃肺虛陰火上衝用補中
益氣加麥冬五味而愈

王叔權治一貴人久患喘夜卧不得而起行夏月亦衣

夾背心知是膏肓病也令灸膏肓而愈亦有暴喘者
知是痰為梗令細剉厚朴七八錢重以薑七片水二
碗煎七分服滓再煎服不過數服愈若不因痰而喘
者當灸肺俞凡有喘與哮者為按肺俞無不痠疼皆
為繆刺肺俞又令灸而愈亦有只繆刺不灸而愈者
此病有淺深也

舍弟登山為雨所搏一夕氣悶幾不救見昆季必泣有
欲別之意疑其心悲為刺百會不效按其肺俞云疼

如錐刺以火針微刺之即愈因此與人治哮喘只謬刺肺俞不刺他穴惟按肺俞痠疼者然後點其他穴

非是

並資生經

滁陽高司法名申之每苦寒喘痰發甚時非此藥不能

治方名五味子湯用橘皮

三兩去白

甘草

一兩半炙

麻黃

四兩去根

節

五味子

二兩杏仁

二兩麴炒去皮尖

右為粗末水一盞半藥

末二大錢煎至七分去渣通口服不拘時候如喘甚

加藥末入馬兜鈴桑白皮同煎夏月減麻黃一兩

醫方

集成醫

說編

陳三農治一人極言痰氣作楚喘急而不能食遍體作痛服清氣化痰藥無異服水何也曰豈止無益反受害矣肥人氣居于表中氣必虛脾弱不能勝濕氣虛不能健運是以多痰而喘以四君子加南星半夏佐以薑汁數劑而愈

劉點生治汪去塵脾虛水逆傷肺喘嗽不食小水不通脈虛不勝補瀉用茯苓五錢澤瀉橘紅各一錢五分

防風肉桂熟附各五分二服水去後加人參調理而

安

張氏
醫通

薛立齋治職方王用之喘嗽作渴面赤鼻乾為脾胃有痰用二陳加芩連山梔桔梗麥冬而愈

一武職體魁梧素不圍爐不喜熱食行則喘促自謂氣

實老疾服碑記丸攻伐之

人名黑
九子

診其脈洪數重按

全無謂命門火衰脾肺虛寒與八味丸一服痰喘稍止數服全止遂能親火喜熱飲食蓋碑記丸出自西

域況方外人所製者經云西域水土剛強其民不衣而褐薦其民華色而脂肥故邪不能傷其形體其病生于內其治宜毒藥由此觀恐不可概用也

太守錢東圩先患肩疽屬足三陰虛火不歸元用壯水之主以制陽光而愈曰瘡疾雖愈當屏去侍女恐相火一動其精暗流金水復竭必致變症後果咳嗽痰出如涌面目赤色小便淋瀝又誤認為外感風寒用麻黃湯表散汗出不止迎視其脈已脫惟太沖未絕

曰此脾虛不能攝涎腎虛不能生水肺虛不能攝氣
水泛為痰虛極之症也辭為難治勉以益火之源以消
陰翳而愈繼又勞傷神思外邪乘之仍汗出亡陽以
致不起

朱丹溪治七三喘喘遇冬則發此寒包熱也解表則熱

自除枳殼三錢炒麻黃防風黃芩桔梗各二錢木通

一錢半

通利九竅治
肺壅甚當

紫蘇五葉分四帖煎取小半盞

飲之

薛立齋治一男咳嗽脈緊數以小青龍一劑表症已解
更以葶藶大棗湯喘止乃以桔梗湯愈

馬元儀治朱千秋患喘嗽自夏及秋羣治不愈自謂已
成陰虛曰陰虛者宜補陰以制火陽虛者宜補氣散
邪今兩脈浮濡浮為虛風濡為氣弱病在陽而補陰
故邪留而不愈也不信又一月食減喘增寒熱自汗
身重不能轉側復求治其脈空大急疾此中氣大虧
虛陽不外固治法先固衛外之陽次補內守之陰則

真氣內振而虛風可熄矣遂與大劑玉屏風散加貝
母杏仁蘇子桔梗一劑而脈症漸和再加入參三錢
二劑諸症漸平惟咳嗽未已以六味湯加入參調理
一月全安

顧芝巖夫人喘嗽半載卧不著枕舌燥無津屢治不應
診之右關尺虛瀦無神此標在肺而本在腎也肺為
出氣之路腎為納氣之府今腎氣虧乏吸不歸根三
焦之氣出多入少所以氣聚于上而為喘嗽口乾不

得安卧中藏經云陰病不能吸者此也法當清氣于上納氣于下使肺得其清肅腎復其蟄藏則氣自納而喘嗽平矣用蘇子降氣湯加入參五錢肉桂一錢連進三劑症漸平改用金匱腎氣湯加入參五錢二十餘劑可以安枕後因補護失宜前症復作乃委之庸手純用破氣鎮逆之劑極詆人參為不可用病者自覺不支求少參不與遂氣敗而死傷哉

邱友疾喘發熱口渴胸滿身如被杖時惡寒或與嘔風

化痰不效診之弦數且濇此情志鬱結而肺燥也今
之醫者但知散風清熱治痰風劑則辛寒劑則苦痰
劑則燥辛能耗液苦能傷氣燥能動火是適助長而
已今欲治痰必先清風清氣必先滋燥使氣得清肅
下行又何痰喘之有哉用姜仁半麴枳殼秦艽杏仁
蘇子少加柴胡桂枝二劑症減半再加生首烏以滋
陰燥大便通而全愈

繆仲淳治臧儀部靜涵患氣喘自汗晝夜不眠食諸醫

以外感治之繆診之曰此腎虛氣不歸元故火上浮
喘汗交作脾虛故不思食亟以麥冬五味枸杞滋陰
斂肺以蘇子橘紅降氣消痰以白芍棗仁茯苓補脾
斂汗不數劑而愈

葉都督患痰喘諸醫作胃虛治之不愈後以導水丸利

五六次而安

平治會萃
薛氏書

蔣仲芳曰周忠介夫人年六十餘患痰喘五六年醫藥
無效士材先生診之曰右寸浮洪肺有實邪須用麻

黃石膏半夏防風細茶生薑等件藥雖峻而病當之
無畏也投之果愈但麻黃只可用二三分服後兼須
避風耳

吳橋治程參軍汶年近耆故病痰喘秋冬速作春夏浸
平頃歸自留都痰喘如昔一醫以為熱也劑以石膏
再服而痰喘不除加以泄瀉一醫以為攻損而虛也
則以人參峻補一服而痰喘大作喉壅塞不能言瞑
而昏昏橋至診之寸口浮大弦數搏指然不任按病

得之鬱怒而傷肝氣法當緩治而二醫以燥急乘之
故甚脈雖九死猶可覲一生乃以導痰湯為劑加苓
連麥冬一服而唾結痰有間稍寤未盡二服結痰越
出喉吻間不能唾則簪入口而衡引之累累連綿
去如敗絮者盈二缶喘乃少定瞑而惛惛如前偃
卧如尸七日乃寤寤則呻吟出息目微開始進勺
飲間日一劑踰月而安或以參軍方趙簡子云

太

集

劉清江曰先君嘗施喘藥盖用麻黃三兩不去根節湯浴過訶子二兩去核用肉二味為塵末每服三大匙水二盞煎減一半入臘茶一錢再煎作八分熱服無不驗者後于彭子壽侍郎傳一方用新羅參一兩作細末以生雞子清和為丸如梧子大陰乾每服百粒溫臘茶清下一服立止嘗見知臨江葉守端向言其祖石林病此需服大黃而愈其尊人亦苦此疾乃純用附子至某則非麻黃不可然則又觀其所稟如何

且自謂其女幼年已喘傳至四世而用藥皆不同

昌劉

詩字興伯號清江
蘆浦筆記

朱武章年三十八客姚江仲冬左額患疔七八日微喘
疔潰後大喘疔愈喘甚坐不能卧醫與降氣清金不
效已二旬歸而渡江北到岸兩脚赤腫如燈籠不能
扱履矣舁負至家一月間更七醫其寬胸者重投厚
朴瀉肺者峻用葶藶有謂表邪未清者有謂脚氣上
攻者有謂水腫入腹者有謂疔毒入肺者謀治腫漸

及囊一醫謂虛也與八味反增譌語診之兩關模糊
左尺不應餘部微數而洪面有紅光倚息不寐小便
濃濁掌心熱灸腎起映瘡以久坐也其舌左邊赤紫
四沿凸凹而左為甚鼻孔乾燥能俛不能仰曰此肝
腎大傷之候初時之疔亦肝火熾甚而作治得其宜
數劑可愈朴蘆既非桂附亦誤今兼治藥必三十劑
乃可與生熟地天麥冬沙參枸杞子萸仁米仁四劑
腫漸消識亦止十劑便清腫退可卧矣唯仰卧及側

向右則喘嗽丁寧又十劑已能應酬賓客但卧仍宜
向左乃加熟地至一兩入五味三分蛤蚧一具一劑
而安四劑全愈

吳性全幼即病喘兒醫與枳桔橘半桑杏前蘇之屬傷
其肺氣遂成痼疾每發必沉綿牀第淹旬浹月年十
七余診之令服重劑肝腎藥加沙參萸仁麥冬之類
自是發漸輕或數月一次仍以前方加減不過數劑
即霍然近則終年亦罕作余治喘多矣多以此法取

效蓋虛喘者十之九實喘者十之一也

金太孺人四旬之外病喘以攻伐之過坐致痼疾已近
七旬忽一醫與三子湯加葶藶服下脇痛厥逆欲脫
余以大劑杞子地黃入川棟一枚得瘳蘭亭其四君
也亦病喘面色眊白發必數日卧牀與以滋水生肝
養金之劑後發漸少而輕自言得狗寶服之而愈此
症凡遇面夭白皮急痰腥穢而小便點滴者不可治
蓋症非肺癰而肺葉壞也肺為水源既敗則小便必

少耳

張司閹年六十餘嗜飲病喘吐痰無算動則勦脇臺肩
倚息或與杏仁枳殼蘇子前胡之類十餘劑喘益甚
枯癆如鬼辭不治矣余與二地二冬米仁萸仁沙參
杞子枳椇子女貞子等八劑全愈戒其勿飲初稍節
久仍縱恣年餘復作左脈如按琴瑟弦此真臟見也
不與藥月餘而沒

呃逆

朱丹溪治紹越陳氏二十餘歲因飽後奔走數里遂患
噦病但食物連噦百餘聲半日不止飲酒與湯則不
作至晚發熱如此者二月脈濡數以血入氣中治之
用桃仁承氣湯加紅花煎服下汚血數次即減再用
木香和中丸加丁香服之十日而愈

一人病後呃逆不止聲聞隣家或令取刀豆子燒存性
白湯調服二錢即瘥蓋取其下氣歸元而逆自止也

本草
綱目

遂巖治一人傷寒陽明內實地道不通發呃其脈長而實以大承氣湯下之而愈

一人傷寒七日熱退而呃聲不絕六脈沈細無力倦甚以補中益氣湯加附子日進三服而安

一人酒色過傷醫作外感治發汗過多絕食日久致氣血兩虛相火冲上呃逆五六日不止治以半夏黃連以瀉逆氣歸芍生地知母以養陰炒柏以瀉冲火二三劑而愈

陳三農治一人患溫熱病十餘日身熱面紅舌燥黑欬
逆日夜不止者三日衆醫以脈遲無力欲用丁附回
陽熱劑陳以手按其胸腹痛不可近曰脈微遲非元
氣虛由邪熱內實壅滯其脈而然也用解毒承氣湯
入甘遂末三分下咽而躁熱片時去黑糞三四升熱
退呃止而安

一人患溫熱病大便不通用下藥糞去而呃大作衆尤
下藥之過曰此燥糞在腸胃遏氣于下糞去而鬱氣

暴升故奔迫而作呃耳以枳殼飲之而安

一人呃逆連聲脈來有力因相爭肝木受邪自思金能尅木用鐵二斤燒紅水淬飲之即愈

一婦患時疫飲水過多心下堅痞欬逆倚息短氣不卧湯藥不下諸藥無效作停飲治之進以五苓散一劑

而安

以上皆
大還

盧不遠治陳孟抒室人因怒發呃三日夜召診以來遲意甚不懌脈之曰固來遲然效極速果一劑而愈此

蓋肝鬱盛怒弗暢氣將入胃而不能故發呃今不治
呃用柴胡等條達木鬱鬱解即止暴病氣全故易愈
也

吳孚先治袁氏女陡發呃症有用丁香柿蒂者有補之
瀉之者有灸之者俱不效乃與柴胡桔梗等味開提
之不三劑而愈良由鬱怒肝木不舒上乘于胃故作
呃經曰木鬱則達之此之謂也

喻嘉言治王岵翁素有脾約症得潤劑即解冬盡偶飽

食當風而吐胃氣大傷微發熱左關脈甚大自云中
脘不舒氣覺攻左初飲梨汁不投今服蔗汁稍定喻
曰此虛風之候也以胃中空虛若谷風自内生左投
肝木而從其類是以氣攻左而左脈即為之大且勁
經云風淫于內治以甘寒梨蔗皆甘寒而一效一不
效者乃胃中氣虛極不奈梨性之達下而喜蔗性之
和中也遂以甘寒定方人參竹瀝麥冬生地之屬衆
議除參不用服後腹內呱呱有聲嘔出黃痰少許胸

中遂快次早大便亦通症以平安然本胃經受病而
胃脈反和惟心腎肝肺之脈不安其故口中味淡湯
飲不肯下行此中央氣弱不能四迄轉達也宜急用
四君子湯理胃氣不信別召二醫一謂中風一謂傷
寒微用表劑即汗出沾濡氣高神蕩呃逆不休矣再
投黃連一劑則脈亂如沸羹頻轉頻歇神昏身強年
壽黑滯氣出順而入必噦晝夜萬三千五百息即噦
亦如之二醫却禍謂喻前議四君子湯余始可用喻曰氣

已出而不入再加參朮之臑阻立斷矣惟仲景旋覆
代赭一方可收神功于百一進一劑而噦勢稍減二
劑加代赭至五錢噦遂大減連連進粥神清色亮脈
復體輕再用參苓麥冬木瓜甘草平調二日康復如
初

張三錫治一老人內傷飲食消導未減或悞與潤腸丸
二服下清水脹痛轉甚或復投巴豆丸二服致呃逆
不止用大劑六君子湯二帖至五帖全止補養而愈

一老人深秋患痢發呃逆嘔吐黃柏炒燥研末陳米飯
為丸小菟豆大每服三十九人參白朮茯苓三味濃
煎湯下連服三劑即愈切不可下丁香等熱藥

陳良甫治一人痢疾呃逆不止六脈沈弱諸醫藥灼艾
皆無效乃投退陰散兩服愈又嘗治許主簿痢疾咳
逆不止諸藥無效灸期門穴不三壯而愈

良方

王叔權治一男子忽氣出不絕聲病數日矣以手按其
臆中而應微以冷針頻頻刺之而愈初不之灸何其

神也

經 資生

陳霞山治一人欬逆上氣體重氣短脹滿坐不得卧常

作水雞聲用白前湯白前二兩紫苑半夏各三兩大

戟一兩水一斗煮三升分三服

水腫大實之治

薛立齋治一婦人痢後嘔噦

即呃逆也

服降火化痰等劑愈

甚脈洪大按之虛細作渴飲湯諸藥到口即嘔此脾

胃虛寒不能司納以參朮炮薑末各一錢以飯作丸

米飲不時送三五粒至三兩許聞藥不嘔乃以六君

加炮薑三十餘劑而安

一婦人患症同前飲食少思胸腹膨脹大便不實所見之症悉屬虛寒假實遂朝用補中益氣湯加炮薑木香夕用六君子湯送四神丸漸愈又用八味丸料煎送四神丸而痊

一婦人因怒嘔噦時或昏憤口噤或時舉體內動其面色或青或赤此肝火熾甚脾土受侮用小柴胡湯加山梔鉤藤治之漸愈又用加味歸脾逍遙二藥調理

而痊

繆仲淳治高存之隣人賣腐者傷寒微噦兩日夜不省人事其子乞方問之曰汝父當時曾頭身熱乎曰然曰曾服汗藥乎曰未也曾吐下乎曰未也因索傷寒書檢之其方類用乾薑柿蒂丁香及附子等溫熱之

藥

檢方云云者蓋示人以病係陽明熱嘔以上諸藥均不可用非臨陣者兵書也

未條僅載

白虎湯一方繆思之曰傷寒頭痛口渴身熱本屬陽

明熱邪傳裏故身涼發噦

傳裏身涼亦是金針

未經汗吐下邪

何從而出但其人年老多作勞故于白虎湯中加人參三錢二劑立起

馬元儀治葛懷年六旬外下痢呢逆兩足徹冷或以痢治之轉劇診之兩脈虛微此中氣挾寒下痢當大劑溫補以恢復元氣時有言下痢多由濕熱在胃不行清理而反溫補恐未合曰濕熱傷者其脈必實其腹結痛且無呢逆足冷之症此由年高氣弱火衰於下氣虛于中因之升降失常而輸泄無度溫補非治痢

也陽回則痢自止耳若必俟痢止而後補之晚矣遂
與人參四兩合附桂理中湯連投四大劑而瘥

陸聖修年逾六旬呃逆泄瀉面赤如赭足冷如水兩脈
沈微曰人身之中賴元氣以充養今因泄瀉而氣衰
于下復因呃逆而氣傷於上上下下交征年高氣弱何
以當此所幸者猶未喘與汗尚可挽也與附子理中
湯大培火土加丁香以煖胃止呃蓋一法而升降之
道備焉降者以腎中陽旺則氣不上僭而下收崇土

之功升者以脾中陽旺則氣不下陷而中守其運行之職則飲食自然變化精液而泄瀉安有不愈者乎朱氏子未第時患腹脹食少倦怠自汗呃逆口乾脈之左得弦急右見虛微此中虛肝盛得之煩勞且怒也煩勞則陽氣分馳而脾胃損鬱怒則肝木橫肆而脾胃傷由是汗出不止脾虛而膝理不固也口中乾燥者脾虛而精液不升也腹脹者氣虛而傳化失常也食少者胃陽不化健運失職也呃逆者五陽不布陰

氣用事也當用附桂理中湯大培中土土旺則不受制于木且能生肺以制木也服四劑脈漸起脹漸平

因停藥數日脹如故與大劑桂附理中湯少加沈香

以和胃氣而行肝氣調理一月而安

病本多項因呃逆為病之窠故入

老僕王忠婦嘔逆呃氣幾無寧刻脈之右寸獨大餘脈虛微此中州土敗水氣不行五陽不布濁陰上逆也與五苓散一劑服後一時許吐逆頓止再與附桂理中湯連服之明日兩脈向和呃逆亦止微覺倦怠與

加桂理中湯四五劑而安

張意田治董友之母年將七旬病已八日脉之軟緩而

遲滯發熱日晡益甚舌胎黃厚大便不行

便知非丁香柿蒂症

畏寒呃逆閱諸方咸以老年正氣用丁香柿蒂與補

陰之劑夫脉來遲滯畏寒陽邪入裏也舌胎黃厚日

晡熱盛陽明實也此乃表症未解而陷裏之勢急致

氣機逆窒而發呃法當下之母以年高為慮也與小

承氣服後大便秘轉矢氣兼有心煩大不寧之狀再與

一劑臨晚下黑屎數枚二更戰栗壯熱四更大汗天明又便黑矢然後呃止神清而睡此實症之呃也宜審之

朱丹溪治一中年婦人病噦以四物湯加和臼陳皮留尖桃仁生甘草酒紅花濃煎入驢尿飲以防其或生蟲也與數十帖而呃逆除矣

婁全善治其兄九月得滯下每夜五十餘行嘔逆食不下五六日後加呃逆與丁香一粒噲之立止但少時

又至遂用黃連瀉心湯加竹瀝引之呃雖少止滯下

未安若此者十餘日

病久故可用瀉

遂空心用御米穀些少

瀉其滑日間用參朮陳皮之類補其虛自服御米穀之後呃聲漸輕滯下亦收而安

沈明生治唐玉如夏間患血淋數日淋止發呃舉體振動聲大且長或與開胃消痰益劇勺粒不入已兩日夕又欲進丁香柿蒂且加薑桂參耆診之乃陰衰火炎症也蓋勞役而兼房憊時際炎歟水不制火血少

而氣上冲是以脹滿不食呃逆不已今六部脉洪數
顏如煤炲大便六七日不行小水滴瀝不快經云諸
逆衝上皆屬于火先哲云呃滿須看前後部腎虛不
能納氣歸元故呃聲長大從丹田出丁香柿蒂可妄
投耶乃先用膽導得垢數枚覺兩足微煖此逆氣下
達也即以六味湯料稍減山藥萸肉入黃連梔子車
前牛膝薄暮煎服不夜分呃全愈矣明晨進粥滯色
漸清夫呃症有寒熱之分呃聲有上下之別今以勞

劇之體血淋後見之是不由胃而由于腎也六脈洪
數大小便不利是不由于寒而由于熱也真水耗于
平日火症萃于一時虛則肝腎不能納氣自下焦上
逆為聲非中焦熱邪之比其腰疼顏黑俱屬可虞幸
得而足溫得補而噦止乃壯水制陽明之明驗亦坎
離既濟之佳徵也依方調理半月全瘳

婁東吳夫令梅頓先生弟也丁未夏歸自燕臺炎風烈
日不無感受萑苻出沒不無驚恐舟中兼有當夕者

至中途疲繭殊甚疾棹抵吳門或謂憔悴之體竟應
投補沈見脉數未平氣口獨盛以為虛中有實熱初
用藹苓等劑溯其源也繼用疎利等劑導其流也宿
垢既除旋培元氣元氣漸復行且勿藥矣因設酬勞
之宴勞憊甚其夕神昏肢倦俄而發呃沈曰勞復發
呃當施溫補無疑第虛氣上逆其勢方張恐湯藥未
能即降須艾炷佐之為妙一友于期門穴一壯即緩
三壯全除調補而瘥

祖姓人年近七旬素有胃痛病于二月間忽發呃晝夜
不絕聲者十餘日胃亦痛食入即嘔或與二陳湯加
丁香藿香等病轉劇脈之兩手皆洪數兩寸溢而鼓
時見歇至乃厥陰之火上衝而然與杞子米仁各一
兩沙參五錢麥冬三錢酒連四分二劑而愈後半年
病復作以貧乏無力再藥而死此貧亦為不治之一
也哀哉

汗

竇材治一人額上時時汗出乃腎氣虛也不治則成勞
瘵先灸臍下百壯服金液丹而愈

一人夜多虛汗亦腎氣虛也服金真丹黃芪建中湯而
愈

一人每日四五遍出汗灸關元穴亦不止乃房事後飲
冷傷脾氣復灸右命門百壯而愈

常東軒擬晚苦陰汗有教之用牡蠣粉撲之者始雖少
減久之至潰腐見其罌丸焉豈非別殺以藥乎

志雅堂
雜抄

瑋按陰汗必由下部濕熱而成以牡蠣收瀉之故
鬱瘀而潰爛也

宋懷州知州李治與一武臣同官怪其年七十而輕健
面如渥丹能飲食叩其術則服首烏丸也乃傳其方
後治得病盛暑中半體無汗已二年竊自憂之造丸
服至年餘汗遂決體其治血治風之功大有補益方
用赤白何首烏各半斤米泔浸三夜竹刀刮去皮切
焙石臼為末煉蜜丸梧子大每室心溫酒下五十丸

亦可末服

本草綱目

滑伯人治一人暑月病身冷自汗口乾煩燥坐臥欲于泥水中脈浮而數按之豁然空散曰脈至而從按之不鼓諸陽皆然此為陰甚格陽得之飲食生冷坐臥當風所致以真武湯

附木茯苓

冷飲一進汗止再進燥去

三飲而安

琇按江案暑門滑治一人汗出如雨身熱煩燥醫誤用木附乃以黃連人參白虎三進愈之宜參看

薛立齋治一婦盜汗不止遂致廢寢神思疲甚口乾引飲作血虛有熱用當歸補血湯代茶炙芪一兩當歸三錢又以六黃湯加人參五味子二劑而愈

陳三農治一人感寒用麻黃發汗汗遂不止用建中湯汗出愈多痰喘有聲此傷寒損血兼用藥之過陰虛而陽無所附遂用川芎三分白芍生地各二錢當歸一錢元胡索香附各三分再服而愈

四物是矣加香附元胡是所不解

一少年人汗出三年不愈用棉子炒黑入湯一滾服四

五日脚腿能立後以歸脾補中等湯而安

楊乘六治朱氏子年二十外勞倦發熱上半身自汗如雨三晝夜不止一切斂汗方法無效脈之浮細沉洪軟弱無力面白無神舌胖而軟且白滑意此必肺氣大虛而腠理不固也以黃芪湯加五味附子各二錢自子至卯連進三劑其汗如故思之良久乃用蜜炙黃芪二兩人參五錢白朮一兩蜜升麻柴胡陳皮各一錢歸身炙草炒黑乾薑各二錢白芍五味附子各

三錢大棗五枚一劑而斂此症本以勞力傷其脾肺
中藏之陽陷而不升衛外之陽虛而不固以致陰氣
不肯下降乘虛外溢故特用升麻以升提下陷之氣
用黑薑以收固衛外之陽使在外而為陰之衛在內
而為陽之守也後用清金滋水等劑而愈

薛立齋治一婦人盜汗自汗遍身痠疼五心發熱夜間

益甚或咳嗽咽乾月經兩三月一至用加味逍遙散

六味地黃丸兼服臨卧又服陳朮丸

陳皮白朮

三月餘諸

症悉愈其經乃兩月一至又服兩月而全痊

一婦人患前症食少倦怠肌肉消瘦日晡發熱至夜益

甚月水過期漸至不通

猶奪汗者無血也

時發渴燥

汗多而津液涸

誤用通經之劑熱倦愈重飲食愈少乃用八珍加升麻丹皮山梔柴胡治之熱漸退又用八珍丹皮軟柴

胡調而愈

羅謙父曰齊大兄因感寒邪頭項強身體痛自用酒服靈砂丹四五粒遂大汗出汗後身輕至夜前病復發

以前藥復汗其病不愈復以通聖散發汗病添身體
沉重足脛冷而惡寒是日方命醫醫者不究前治又
以五積散汗之翌日身重如石不能反側足脛如冰
冷及腰背頭汗如貫珠出而不流心胸躁熱煩亂不
安喜飲西瓜梨柿冰水之物常置左右病至于此命
診之六脈如蛛絲微微欲絕乃以死決之主家曰得
汗多矣焉能為害曰夫寒邪中人者陽氣不足之所
致也而感之有輕重治之豈可失其宜哉仲景云陰

盛陽虛汗之則愈汗者助陽退陰之意也且寒邪不能自汗必待陽氣泄乃能出也今以時月論之大法夏月宜汗然亦以太過為戒況冬三月閉藏之時無擾乎陽無泄皮膚使氣亟奪為養藏之道也逆之則少陰不藏此冬氣之應也凡有觸冒宜微汗之以平為期邪退乃已急當衣煖衣居密室服實表補衛氣之劑雖有寒邪勿能為害此從權之治也今非其時而發其汗乃謂之逆仲景有云一逆尚引日再逆促

命期今本傷而并汗汗而復傷傷而復汗汗出數四
使氣亟奪衛氣無守陽泄于外陰乘于內故經云獨
陽不生獨陰不長不死何待雖廬扁亦不能活也是
日至夜將半頃強身體不仁手足搐急爪甲青而死
矣金匱要畧云不當汗而妄汗之奪其津液枯槁而
死今當汗之一過中亦絕其命況不當汗而強汗者乎
華佗傳縣吏尹世若四肢煩口中乾不欲聞人聲少便
不利佗曰試作熱食得汗則愈不汗後三日死即作

熱食而不汗出佗曰藏氣已絕于內當啼泣而絕果

如佗言

此亦藏氣傷燥之病 三國志

馬元儀治沈康生夫人病經一月兩脈浮虛自汗惡風此衛虛而陽弱也與黃芪建中湯一劑汗遂止夫人身之表衛氣主之凡所以溫分肉肥腠理司開闔者皆此衛氣之用故內經曰陽者衛外而為固也今衛氣一虛則分肉不溫腠理不密周身毛竅有開無闔由是風之外入汗之內出其孰從而拒之故用黃芪

建中湯以建立中氣而溫衛實表也越一日病者又手自冒心間脈之虛濡特甚此汗出過多而心陽受傷也仲景云發汗過多病人又手自冒心心下悸者桂枝甘草湯主與一劑良已

丁庠生頭汗火升食少心悸恍惚不寧或議用滋陰脈之兩寸獨鼓兩關尺虛微少神此脾腎交虧真陽欲脫之候也與人參桂附理中湯大培火土以復虛陽彼以生平不任熱劑為辭曰若謂頭汗火升為火邪

上熾耶不知此乃真氣上越也且謂心悸恍惚為陰
氣內虧耶不知此乃真元無主也遂與人參四兩白
朮五錢附子肉桂各三錢乾薑二錢炙草一錢連進
四劑脉始和症始退再溫養元氣一月而安

羅謙甫治刑部侍郎王立甫之壻年二十五仲冬因勞
役憂思煩惱飲食失節而病時發躁熱肢體困倦盜
汗濕透其衾不思飲食氣不足以息面色青黃不澤
診其脉浮數而短濡兩寸極小曰此危症也治雖粗

安春至必死當令親家知之夫人不以為然遂易醫
至正月躁熱而卒他日王謂羅曰吾壻果如君言願
聞其理曰此非難知也內經曰主勝逆客勝從天之
道也蓋時令為客人身為主冬三月人皆懼寒獨渠
躁熱盜汗是令不固其陽時不勝其熱天地時令尚
不能制藥何能為冬乃閉藏之月陽氣當伏于九泉
之下至春發為雷動為風鼓圻萬物此春生之道也
如冬藏不固春生不茂又疫癘之灾且人身陽氣亦

當潛伏于內不敢妄擾無泄皮膚使氣亟奪此冬藏之應也令壅汗出于閉藏之月腎水已涸至春何以生木陽氣內絕無所滋榮不死何待乃嘆息而去

施笠澤治一人服參芪數日後每將昏反發熱至夜得盜汗而解曰此陰虛不能勝其陽也參芪雖能補陽助陰而陰血未易驟生乃用六味丸料加參歸陳皮一劑而熱退汗止後以六味丸參苓白朮散全愈

庠友張君牙患寒熱咸作瘡治服解表之劑乃盜汗潮

熱肢節頸項強痛夜卧則汗出如沐濕透重衾二旬
餘目不交睫診得左寸微細欲絕右尺浮大無力此
汗多亡陽症也與加味歸脾湯不效自加麥冬更服
二劑胸膈滿悶飲食不進遂疑參朮不可服一僧欲
進大劑苦參湯施曰診法陰盛陽衰者不可以柔藥
柔藥助陰陽氣衰弱陰氣益著實實虛虛之禍其能
免乎今君相二火俱虧非急進歸脾湯加桂心五味
不可豈前藥有陳腐或炮製失宜耶令取藥一劑是

夜即安汗亦漸止間進八味丸一月而愈

庠生施爾祁病脈之曰陰虛火動也病使人發熱盜汗肢節作楚正合丹溪滋陰降火之劑服三日後服虎潛丸病全愈所以知爾祁之病者切其脈虛而數經云血虛脈虛腎水之真陰不足而虛火妄動也先是一醫謂是歷節風飲以風劑即支節浮腫痿弱不能行汗出如沐經云足受血而能步又云奪血者無汗奪汗者無血蓋風能生火又能生血血虛則內熱益

甚支熱則腫肺則痿矣

錢國賓治荊州李山人年四旬餘凡飲食頭上汗多氣如煙霧必頻抹乃止寸關浮洪兩尺沈實胃脈倍盛而數此胃熱蒸籠頭也飲食入胃遇熱上薰心肺心主汗液火性上騰肺主皮毛腠理不密故頭汗出若蒸籠之氣因煎迫而如煙霧也以三黃石膏湯數劑清胃熱愈

詹渭風母年六旬外素有肝病因患瘰癧自五月至九月

瘡愈而他症風起自汗如洗徹夜不眠食少便溏脇
痛齒痛口淡惡心惡風畏寒頭頂皮帽身襲皮衣重
幃夾幔猶慄慄不勝診時先以止汗為屬脈之弦小
急疾知為陰虛火盛瘡邪未清誤作陽虛多與補氣
斂汗之劑而然叩之果服歸脾五味子麻黃節浮麥
龍骨甚夥乃與生地杞子地骨釵斛首烏鼈甲黃連
萸仁滑風曰諸醫咸謂頭為諸陽之首惡寒若此又
自汗而喜熱飲明屬陽虛今方中唯與養陰又口淡

便澹惡心皆屬脾胃虛寒黃連薑仁安可用至瘡疾
已愈何必用首烏鼈甲再所重在汗多而又全不治
汗其故何也曰此症乃火鬱之極內真熱而外假寒
也瘡本膽腑之邪因肝虛而腑傳臟故寒熱止而變
為諸症故以生地枸杞地骨奴斛養肝治其本黃連
清伏暑薑仁散鬱熱以治標首烏鼈甲入肝而去瘡
邪蓋肝火熾盛逆入胃絡上蒸則為汗下迫則為瀉
若見汗則收斂見瀉則固滯一藥肆人足矣醫云乎

哉如方服之數劑而愈

何某年七旬矣偶于冬間苦盜汗乃水衰肝火內熾當
閉藏之候反蒸鬱而為汗也或教以黃芪煮黑棗服
之四五日汗果止而咳嗽作或以為傷風與前胡桔
梗杏仁蘇子秦艽防風之類或以為痰火與二陳薑
汁竹瀝或以為血氣與四物知母黃柏咸不效已半
年診其脈則弦數而促其症則痰多食少天柱已傾
雙足浮腫投以生地麥冬杞子地骨沙參女貞四劑

無進退已召畫工傳真矣告曰某本籍越中今病已膏肓量不可起治任欲歸第乞疏一方俾方服多劑者以希萬一耳仍前方加熟地萸仁與之後二年偶遇之客坐彼前致謝甚殷余茫然叩其故曰某何姓昔患咳嗽幾斃蒙惠方渡江後服廿餘劑竟獲全愈此再造之德也視其容貌充腴迥非疇曩其病之痊殊意外矣書此以為輕信單方并見汗治汗之戒

楊元植年四旬外早衰鬚髮盡白素患肝腎病客吳門

病瘡瘡愈而汗出不止凡生脈飲六黃湯牡蠣龍骨
五味黑豆一切斂汗之劑莫不嘗之吳醫伎窮乃過
歸就予診脈但虛數與熟地一兩杞子五錢棗仁五
錢麥冬二錢萸仁一錢胡黃連四分地骨皮三錢一
服減二服瘡

趙坤維令正病自首至胸汗出如沐動則尤甚頗能食
然食入則滿面瀉淋衣領盡透醫與玉屏風散當歸
六黃湯如不服延診右關寸數大問面浮及齒痛否

曰然此少厥二陰之火上逆胃絡也與重劑玉女煎
入杞子五錢川連少許二帖而瘳

楊兆成年十許病瘡瘡愈大汗如雨一日夜約斗許醫
盡力與固表收瀉反較麻黃羌活為甚延診脈洪數
有力日啖粥十數甌猶覺飢蓋瘡時多服半夏豆蔻
蒼朮厚朴藿香橘皮諸燥烈之劑擾動胃火而然若
與六黃湯則汗止而瘡必更作乃用生地一兩石膏
五錢黃連八分麥冬三錢萸仁一錢半一服減二服

瘥瘡亦不作

張王書年近六旬素患陰虛火甚兩手脈常溢入掌心
夏月偶不快就混堂澡浴以圖汗解歸而寒熱大作
頭痛兩耳後焮腫上連承靈下至天牖急余視余適
他出別延外科謂當成耳枕癰勢甚危投以搜風敗
毒之劑腦後肩甲筋絡益抽掣急絳燥渴燥悶小便
淋瀝如火迨余至困憊不支矣脈之洪數異常知其
中熱邪在陽明少陽以陰虛過汗火驟升土又為風

藥所鼓而然不可與柴胡乃君以黃芩石膏臣以鮮
乾兩地黃佐以滑石生甘草使以連翹木通大劑飲
之次日腫痛減腫處尚赤色前方入萊菔一合腫痛
全消再與導赤散合六一散而愈

續名醫類案卷十九

欽定四庫全書

續名醫類案卷二十

錢塘魏之琇撰

咳嗽

徽宗寵妃苦痰嗽終夕不寐面浮如盤詔內醫李防禦
用藥令供伏三日不效當誅李憂撓技窮與妻對泣
忽聞外間叫云咳嗽藥一文一帖喫了今夜得睡李
使人市藥十帖其色淺碧用淡蘼水滴麻油數點調

服李疑草藥性獷或使臟腑成滑泄併三為一自試
之既而無他於是取三帖合為一携入禁庭授妃請
分兩服以餌是夕嗽止比曉面腫亦消上喜賜金帛
直萬緡李念病即安倘索方無以為對令僕俟前賣
藥人過邀飲以百金賂其方乃蚌粉一物新瓦炒令
通紅拌青黛少許耳叩其從來曰壯而從軍老而停
汰頃見主帥有此故剽得之以其易辦姑藉以度餘
生無他長也李給之終身

槎卷
小乘

潘墁曰予夏秋之交火嗽月餘晝夜不輟聲不能伏枕
幾殆羣醫皆主故常曰西方金司令肺氣盛耳當瀉
或曰久嗽肺虛當補或曰斂之愈予曰金初司令穉
金也火尚未伏壯火也壯火能燂穉金瀉肺金愈弱
火愈熾此嗽所以不能止也經曰無違時無伐化又
曰無伐生生之氣今氣初生而瀉之伐化也殆于不
可況五火相煽肺失清化之令補之恐反助火斂之
恐不能散火請更思之醫不聽各主所見饋藥不敢

嘗日飲解毒涼膈散去硝黃加白朮以助胃氣晨服
童便不時服梨汁瓜漿各十數杯醫乃暗投人參五
味煎以飲予而予不知也飲之則愈嗽加喘乃專主
已見飲前藥數日火退嗽止而病瘳矣

楮記室

漢陽庫兵王六病痰嗽并喘百藥不效于岳陽遇一道
人教用五味子白礬等分為末每服三錢以生豬肺
炙熟蘸末細嚼白湯下兩服病遂不發

本草綱目久病乃可服此

張子和治東門高三郎病嗽一年半耳鳴三月矣嗽膿

血面多黑點身表俱熱喉中不能發聲曰嗽之源心
火之盛也秋傷于濕冬生咳嗽冬水既旺水濕相接
隔絕于心火火不下降反而炎上肺金被燠發而為
嗽金嗽既久聲反不發醫補肺腎皆非也令先備西
瓜冰雪等物其次用涌泄之法又服去濕之藥病日
已矣

劉氏一男子年二十餘病勞嗽咯血吐唾粘臭不可聞
秋冬少緩春夏則甚寒熱往來日晡發作狀如瘡癰

寢汗如水累服麻黃根敗蒲扇止汗汗自若也又服
寧神散寧肺散止嗽嗽自若也張先以獨聖散吐其
痰狀如雞黃汗隨涌出昏憤三日不省時時飲以涼
水精神稍開飲食加進又與人參半夏九桂苓甘露
散服之不數日乃愈

趙君玉妻病嗽時已十月矣張處方用陳皮歸身甘草
白朮枳殼桔梗趙以其不類嗽藥張笑曰君怪無烏
梅瞿栗囊乎夫冬嗽乃秋之濕也濕上逆而為嗽此

方皆散氣除濕解結和經三服而愈

竇材治一人病咳嗽盜汗發熱困倦減食四肢逆冷六脈弦急乃腎氣虛也先灸關元五百壯保命延壽丹二十九鐘乳粉二錢間日服金丹百丸一月全安一人病咳嗽脈症與上條同但病人怕灸止服延壽丹五十粒金液丹百粒鐘乳粉二兩五日減可十日脈沈緩乃真氣復也仍服前藥一月全安蓋此病早不灸亦可遲必加灸否則難治

凌漢章治里人病嗽絕食五日衆投以補劑益盛凌曰
此寒濕積也穴在頂針之必暈絕逾時始蘇命四人
分牽其髮使勿傾側乃針果暈絕家人皆哭凌言笑
自如頃之氣漸蘇復加補始出針嘔積痰斗許病即
除

明史

一中年婦人乾咳寸脈滑動似豆狀餘皆散大不浮左
大于右每五更心躁熱有汗但怒氣則甚與桔梗不
開諸藥不效遂以石膏香附為君芩連青黛門冬瓜

薑仁陳皮炒栢歸梗為臣五味砂仁川芎紫苑為佐

凡二十餘帖而安

醫學綱目

崔某療久嗽熏法每旦取款冬花如雞子大少許蜜拌花使潤納一升鐵器鑊中又用一瓦椀鑊一孔內安小竹筒或筆管亦得其筒少長置椀鑊相合及挿筒處皆麵糊塗之勿令泄氣鑊下著炭火少時款冬烟自竹管出以口含筒吸取咽之如胸中稍悶須舉頭即將指頭捻竹筒頭勿令漏烟出氣及烟盡止凡如

是五日一為之至六日則飽食羊肉餽飢一頓永瘥

一法不用錫瓶用有嘴瓦瓶燒藥蓋住瓶口却以口于瓶嘴吸烟咽之尤捷

侍御譚希曾咳嗽吐痰手足時冷以為脾肺虛寒用補

中益氣加炮薑而愈

實材以肢冷為腎氣虛

一婦人患咳嗽脇痛發熱日晡益甚用加味道遙散熟地治之而愈年餘因怒氣勞後前症仍作又太陽痛或寒熱往來或咳嗽遺尿此肺氣虛肝火盛而尿脬失制也用前散及地黃九月餘而瘥

表弟婦咳嗽發熱嘔吐痰涎日夜約五六碗喘咳不寧
胸痞燥渴飲食不進崩血如涌此命門火衰脾土虛
寒用八味丸及附子理中湯加減治之而愈

一婦人久咳嗽面色痿黃或時眊白肢體倦怠飲食少
思稍多則瀉此脾土虛而不能生肺金朝用補中益
氣湯夕用六君子湯為主間佐以八珍湯三月餘漸
愈後感寒邪喘嗽胸腹作脹飲食不入四肢逆冷此
中氣尚虛不能充皮毛腠理司開闔之所致也遂用

六君加生薑及桔梗而愈

一婦人患勞嗽晡熱內熱寒熱往來作渴盜汗小便頻數其經兩三月一行此肝脾氣血虛損用八珍湯六味丸六十餘劑諸症漸愈其經兩月一行仍用前二藥間以加味逍遙散各三十餘劑後恚怒適經行去血過多諸症悉至飲食少思腹脹氣促用十全大補湯數劑漸愈仍用前藥調補復因喪子胸腹不利食少內熱盜汗便血無寐用加味歸脾湯仍兼前藥而愈

錦衣李大用素不慎起居吐痰自汗咳嗽發熱服二陳
苓連枳殼山梔之類前症不減飲食少思用四物二
陳苓連元參知柏之類前症愈甚更加胸腹不利飲
食亦少內熱晡熱加桑皮紫蘇杏仁紫苑桔梗之類
胸膈膨脹小便短少用豬苓澤瀉白朮茯苓枳殼青
皮半夏黃連蘇子胸膈痞滿脇肋膨脹小便不通加
茵陳葶藶喘促不卧飲食不進診之六脈洪數肺腎
二部尤甚曰脾土既不能生肺金而心火又乘之此

肺癰之作也當滋化源緩則不救不信後唾膿痰復求治胸膈痞滿脾土敗也喘促不卧肺金敗也小便不通腎水敗也脇肋膨脹肝木敗也飲食不化心火敗也此化源既絕五臟已敗藥豈能生已而果然

絲客姚荃者素鬱怒年近六十脾胃不健服香燥行氣飲食少思兩脇脹悶服行氣破血飲食不入右脇脹痛喜用手按彼疑為膈氣痰飲內傷曰肝木剋脾土而脾土不能生肺金也若內有瘀血雖單衣亦不敢

著肉用滋化源之藥四劑諸症頓退彼以為愈曰火
令在適當補脾土以保肺金彼不信後復作另用痰
火之劑益甚求治左關右寸滑數此肺內潰矣仍不
信服前藥果吐穢膿而歿

嘉興周上舍每至夏患咳嗽服降火化痰之劑咳嗽益
甚脾肺腎脈皆浮而洪按之微細此脾土虛不能生
肺金肺金不能生腎水而虛火上炎也朝用補中益
氣湯夕用六味地黃丸而痊後至夏遂不再發

一婦人不得于姑患咳嗽胸膈不利飲食無味此脾肺俱傷痰鬱于中先用歸脾湯加山梔川芎貝母桔梗諸症漸愈後以六君加川芎桔梗間服全愈

一婦人咳嗽脇痛或用清氣化痰降火等劑久不愈更加內熱晡熱若兩脇或小腹內熱其嗽益甚小便自遺此屬肝經血虛火動用六味丸加五味子滋腎水以生肝血用補中益氣生脾土以滋肺金而尋愈上舍陳道復長子虧損腎經久患咳嗽午後益甚薛曰

當補脾土滋化源使金水自能相生時孟春不信乃服黃栢知母之類至夏吐痰引飲小便頻數面目如緋薛以白朮當歸茯苓陳皮麥冬五味丹皮澤瀉四劑乃以參芪熟地山茱為丸俾服之諸症頓退復請視以為信遂用前藥如常與之仍泥不服卒致不起陸養愚治吳氏妾寡居夜熱以煩勞感冒乾咳無疾醫與疎風藥反增嘔惡更以二陳症不減而夜不能寐若失神志煩亂不安脈之沈弦而數曰乾咳乃火鬱

之甚最為難治况寡居多年其鬱可知雖有風寒但
于調理養血開鬱清熱微加疎散若竟發其表升動
陰火則病反甚重以二陳之燥宜其煩亂不寐神志
若失也用清養榮湯加黃芩前胡薄荷杏仁蘇葉二
劑咳嗽煩悶俱減第睡未安脈微浮而數去蘇葉前
胡杏仁加貝母知母山梔棗仁竹茹大棗二劑諸症
俱愈但四肢懈怠氣乏不足以息脈浮數而弱此虛
火已平真氣衰乏之候仍用前湯加貝母棗仁更入

人參一錢五分數劑而愈

陳曙倉室欬嗽或時純血或時純痰或時痰血相半夜
熱頭眩胸膈不舒脚膝無力服滋陰降火藥已半年
矣飲食漸少精神漸羸脈之兩寸關沈數無力兩尺
瀋弱微浮此上盛下虛之症也上盛者心肺間有留
飲瘀血下虛者肝腎之氣不足用人參固本丸令空
腹服之日中用貝母蘇子山查丹皮桃仁紅花小薊
以茅根煎汁入藥同煎十劑痰清血止後以清氣養

榮湯與固本丸間服三日後病痊而孕

陸肖愚治吳遜齋患咳嗽身熱脇痛日輕夜重寢食俱廢咸以年高病重為慮脈之左手浮弦右手弦滑曰此病極輕何必憂疑特內有食積痰飲外感風邪所致也少為消導疎散即愈矣用蘇葉柴胡以解其表青皮白芥以治其脇桑皮前胡杏仁以治其肺嗽陳皮半夏以清其痰山查枳實以消其食二劑而減四劑脫然

陸祖愚治費表母生平酒飲多而穀食少釀成痰火每至五更則疾作喘嗽頻併氣逆息粗不能伏枕由來久矣年近七旬其疾大作日夜昏暈數次四肢厥冷自汗如洗形容瘦削六脈如絲或與清火清痰毫不應乃用附子理中料千杵蜜丸淡鹽湯服以助下元另以知母貝母桑皮葦煎湯徐徐含嚥清其上膈數嚥嗽拂喘止肢溫汗斂再用十全大補湯料九服數十年痼疾從此遂瘳

陳三農之室遇夜嗽甚多痰作陰虛火動以四物換生
地加知母貝母萸仁杏仁麥冬五味二劑而愈

孫文垣姪婦喉中揪痒咳嗽紅痰兩寸關洪大內熱生
瘡山梔小蘗生地丹皮滑石青皮麥冬甘草黃連萸
仁水煎服血止嗽除後遇勞心即效嗽喉中血腥總
由上焦熱甚而然以枇杷葉山梔生地白芍甘草丹
皮地動蜂天花粉滑紫菀常服三五劑兩月而安

溫天衢冬月病目醫與發太過至春間吐血梔餘及夏

下午潮熱咳嗽胸膈脹疼早晨冷汗淋漓大便溏一日兩行飲食少肌肉消十之七脈數孫曰據症脈法在不治衆懇不能辭乃用瀉白散加五味白芍貝母馬兜鈴服下其夜恬然而卧不嗽唯大便溏前藥加扁豆山藥茯苓汗亦漸止復與瀉白散加石斛馬兜鈴貝母陳皮苡仁白芍山藥五味桔梗調理三月而痊

琇按此與孫治吳肖峰內人注夏誤服參蘇飲成

咳嗽同為發散所傷世俗謂傷風不醒變成勞者是也不知此等皆為市醫不知虛實恣用疎散輕病變重而病者至死猶曰傷風不醒哀哉

吳案見痿門

李士材治一人咳而上氣凡清火潤肺化痰理氣之劑幾無遺用而病不少衰診其腎脈大而軟此氣虛火不歸元用人參三錢煎湯送八味九五錢一服而減後用補中益氣湯加桂一錢附子八分凡五十劑及八味九二斤而痊

一人經年咳嗽更醫數十人藥不絕口而病反增劇自謂必成虛勞李曰不然脈不數不虛惟右寸浮大而滑必多服酸收故久而彌甚用麻黃杏仁半夏前胡桔梗甘草橘紅蘇子五劑止十劑已

馮楚瞻治李孝廉患咳嗽甚頻視其身長肥白頰色常紅知為表有餘而裏不足上假熱而下真寒病必當劇勸以重服藥餌時有通譜新貴甚精醫藥乃託其治所用乃山梔黃芩花粉橘紅貝母蘇子杏仁之類

止之勿聽數劑後嗽轉甚煩躁喜冷倍常益信寒涼
為對症倍用之轉劇再進煩躁更甚粒不下咽飲水
無度更以為實熱以三黃丸下之利行不多漸喘促
再劑夜半喘大作有出無入遍身麻木潰汗如雨神
昏目直口禁不言委頓極矣亟邀馮診兩寸左關僅存
時當六月欲與四逆理中主人畏懼改以人參一兩
麥冬二錢五味六分肉桂錢許始允急煎服之喘減
片刻奈病大藥小頃復大作乃不咎寒涼之誤反以

參桂為罪矣因思盡吾之力方可以活若徇彼之見
必死而已乃堅定一方勒令服之用炒白朮三兩人
參二兩炮薑三錢五味子一錢五分製附子三錢煎
濃汁灌之下咽後病人張口大聲云心中如火烙欲
死此不與
冷服故旁觀疑怨交起不為動頃之又大聲曰臍
間更疼更熱欲死矣乃竊喜其陽能下達未之絕也
果少焉喘定汗收手足溫而神思清語言反甚無力
此方术多參少者因中宮久困寒冷不先為理中則

陽氣難下達也

呂東莊治徐鸞和內病咳嗽醫以傷風治之益甚邀診則中虛脈也曰鼻塞垂涕痰急皆傷風實症何得云虛曰此虛實真假所辨在脈庸醫昧此誤人多矣彼不知脈請即以症辨之其人必晡時潮熱至夜半漸清至晨稍安然乎曰然然則中虛何疑乎所可喜者正此鼻塞垂涕耳乃投以人參白朮當歸黃芪白芍各三錢軟柴胡升麻各一錢陳皮甘草五味各六分

三劑而咳嗽立止再診謂之曰上症已去唯帶下殊甚近崩中耳驚應曰然即前方重用人參加補骨脂阿膠各二錢數劑兼服六味九而愈

柴嶼青治陳氏甥女咳嗽吐痰夜間發熱衆醫以為必成勞症診其脈雖稍洪尚有根柢並非細數何至不治純用滋陰之藥調養半年而愈

同學蔡為章患痰嗽夜難就寢身不勝衣卧牀不能轉側診其六脈微弱氣血兩虧擬用參芪補劑蔡以痰

嗽不宜用補為疑乃力任之先用六君子湯加炮薑桂附數帖而嗽減繼用養榮湯十數劑始能下牀行動調理月餘而康

張暢中咳嗽吐痰醫誤認風寒服藥十數劑病增劇身熱喘嗽夜不能卧胸膈痞塞困于牀第小便短縮診得人迎脈緩絕非外感氣口空大左寸弱甚兩尺沈微此心腎不足的係內傷之症其小便不利者三焦之氣化不能運于州都也從東垣治內傷條師其意而變通之旬日而痊

左中丞夫人年六十餘形體瘦弱痰喘息粗夜不能寐
醫頻與消痰理肺愈委頓診其脈甚微細此氣虛也
仲景云氣虛有痰腎氣丸補而逐之遂用六味湯加
麥冬五味治之而愈惟夜間尚未熟睡再用養榮湯
加茯神棗仁十數劑即加餐安睡漸得復元

丙寅新正同鄉諱伊喇齊長郎賀節至寓云咳嗽求方
診其兩脈細數右寸鬱結斷其難以收功勉用麻黃
湯伊斷斷不可曰我患陰虧他醫熟地人參服過數

兩柴曰陰虧誠然但風邪閉塞肺氣補劑又從而壅遏之非此不能去邪力爭不信早決其不起果然

琇按凡損症脈見右寸厥厥然如豆按之梗指其病原屬不起以肺金敗也今以右寸鬱結斷為風邪閉塞然必見鼻塞聲重或頭痛痰濃或咳嗽連續方是其候

王肯堂治一婦人咳嗽不已服諸藥不效漸成勞瘵診之六脈濡弱此血弱又因憂感太過而成斯疾合用

當歸等藥治之必愈遂先古今錄驗橘皮湯空心服
蘇子降氣湯徐用金釵煎熟地黄丸當歸丸調理而

安

未入
遂

張路玉治吳江郭邑侯喘嗽逆氣診之兩尺左關弦數
兩寸右關濡數弦者腎之虛濡者肺之燥夏暑內伏
肺絡遇秋燥收之令發為咳嗽也自言每歲交秋連
發四載屢咳痰不得出則喘至夜不能卧咳劇則大
便枯燥有血曾服越脾湯嗽即稍可張曰公腎氣數

強因水虧火旺陰火上燔肺金肺燥不能生水咳甚

則便燥有血者肺移熱于大腸也

賴有此耳

合用千金麥

門冬方除去半夏生薑之辛燥易以葳蕤白蜜之甘

潤藉麻黃以鼓舞麥冬生地之力與越脾湯中麻黃

石膏分解互結之燥熱同一義也郭曰諸醫咸詆麻

黃為發汗重劑不可輕試僅用杏仁蘇子甘梗前等

藥服之其咳轉甚何也曰麻黃雖云主表今在麥門

冬湯中不過借以開發肺氣原非發汗之謂麻黃在

大青龍湯麻黃湯麻杏甘石湯方其力便峻以其中
皆有杏仁也杏仁雖舉世視為治嗽通藥虛實混然
辛溫走肺最不純良耗氣動血莫此為甚熬黑入大
陷胸九佐甘遂等搜逐結垢性味可知遂用前方連
進二劑是夜便得安睡脈弦雖未退按之稍爽氣口
則虛濡乏力與六味生脈加歲蕤白蜜作湯四服嗽
頓減即以此方製九恒服至秋無復嗽之虞

何督學媳素常咳嗽不已痰中間有血點恒服童真九

不徹以父歿哀痛迫切咳逆倍常痰中襍見鮮血因與瑞金丹四服仍以童真丸烏骨雞丸調補而安

勞太夫人年五十餘素稟氣虛多痰數日來患風熱咳逆咳甚則厄厄欲吐且宿有崩淋近幸向安法當治其咳以桔梗湯加葳蕤白微丹皮橘紅蜜煎生薑四劑撤其標症次與六君子加葳蕤以安胃氣繼進烏骨雞丸方療其固疾以久不如葦葦不忍傷殘物命改用大溫經湯加鹿茸角腮乍九藥雖異而功則一也

陳三農治一婦咳嗽痰喘飽脹水火不通眠食俱廢以
人參白芍為君蘇子炒研細為佐枇杷葉三大片白
茯苓佐之二服得眠大小便通

東坡蓋公堂記云始吾居鄉有病寒而咳者問諸醫醫
以為蠱不治且殺人取其百金而治之飲以蠱藥攻
伐其腎腸燒灼其體膚禁切其飲食之美者期月而
百病作內熱惡寒而咳不已累然真蠱者也又求于
醫醫以為熱授之以寒藥旦夕吐之暮夜下之于是

始不能食懼而反之則鍾乳烏喙襍然並進而漂疽
癰疥眩瞽之狀無所不至三易醫而病愈甚里老父
教之曰是醫之罪藥之過也子何疾之有人之生也
以氣為主食為輔今子終日藥不釋口臭味亂于外
而百毒戰于內勞其主隔其輔是以病也子退而休
之謝醫却藥而進所嗜氣全而食美矣可以一飲而
效從之期月而病良已

容齋五筆
後文節

薛立齋治甥范允迪咳嗽痰盛胸腹不利飲食少思肢

體倦怠脈浮大按之微弱服二陳枳殼等藥愈盛脾肺腎虛也用補中益氣湯六味丸而愈

萬密齋治監生胡篤菴咳久不止汗之不可下之不可因表裏之邪俱甚也為製方用蘇葉薄荷葉桑白皮杏仁霜瓜蒌霜桔梗甘草等分為末虛者阿膠蜜丸白湯下或口中噙化五日而安後以治人多效

立齋治一癰婦咳而無痰日晡發熱脈浮數先以甘桔湯少愈後以地骨皮散而熱退更以腎氣丸及八珍

湯加柴胡地骨皮丹皮而愈丹溪云咳而無痰者此
係火鬱之症及痰鬱火邪在中用苦梗開之下用補
陰降火之劑不已則成勞嗽此症不得志者多有之
又原病式曰人瘦者腠理疎通而多汗血液衰少而
為燥故為勞嗽之疾也

一男子咳嗽氣急胸膈脹滿睡卧不安以葶蘆散二服
少愈更以桔梗湯而瘥

一男子咳嗽項強氣促脈浮而緊以參蘇飲二劑少愈

更以桔梗湯四劑而痊

馬元儀治楊成時咳嗽多痰氣逆作喘自汗不食已兩月脈之虛微無神此勞倦致傷脾肺也經云勞則氣耗氣與陰火勢不兩立氣衰則火自勝土虛既不能生金陰火又從而尅之故喘嗽自汗作矣若行疎泄以定喘止嗽是重耗其氣也用人參二錢黃芪五錢炙草五分貝母一錢杏仁蘇子各二錢紫苑桔梗防風以佐之兼進七味丸以培土母歸脾大造膏以實

脾肺而愈

來天培治一婦年六旬餘季夏酷熱患咳嗽頭疼發熱胸膈不舒或以蘇杏前貝生地黄芩治之轉甚視其面色浮腫懶言氣怯咳嗽聲微胸膈脹滿飲食不下六脈微弱此風寒內伏裏虛致感也始宜以參蘇飲倍薑棗一二劑可已今增虛矣非薑附不能療也以補中益氣湯去升柴加川芎炮薑附子各一劑汗出遍身腫脹漸消再劑熱退改用八珍加桂附二劑而咳

嗽除終以歸脾加熱地炮薑四劑聲高食進矣彼云
舊有風症兩手不能舉今服藥乃能舉于頭矣此治
病必求其本之謂歟


沈明生治金斐文夏患咳嗽清痰續續不絕時風熱嗽
甚多金謂所投之劑非疎風化痰即清金滌熱及診
曰是非溫補不痊金駭愕問故曰君以外感盛行之
際必無內因者耶初得之症必無屬虛者耶是則時
有一定之方症有一定之藥人皆可以為醫矣夫嗽

屬外因必肺氣脹滿咳喘相屬或兼頭疼鼻塞涕唾稠濃聲壯氣壅脈浮數有力或人迎脈大此為外因今脈不浮而沉非風也不數而緩非熱也按之不鼓非有餘也嗽雖頻而氣短不續痰雖多而清薄不濃若疎解則徒耗肺家之金清涼則轉瘠中州之土是欲去病而反重病也宜用補中益氣與六君子參合服方藉參苓朮以補肺之母使痰無由生藉橘半升柴以升清降濁則嗽可不作一二劑嗽微減再服決

旬而愈

吳橋治鄱陽王令領邑甫及期病咳嗽唾痰稠黏而臭
且雜以血久之潮熱失聲食少肉消閉戶踰月將乞
骸骨歸幸橋至診之橋獨任其無害令為欣然且問
橋橋曰此肝氣凌脾治者謬以為陰虛火動劑涼則
脾益滯津液不通肝愈熾而無所制矣法當扶脾抑
肝三劑如脫七劑而出視事

太函集



續名醫類案卷二十